



गल्लबात दे बाद इक सांझी प्रैस वार्ता च मोदी होरें आक्खेया जे अगले दहाके दी कार्ज-योजना च नवाचार, रासपूंजी लाने, पर्यावरण, प्रोद्योगिकी, सेहत क्षेत्र, लोकें-लोकें बश्कार सम्पर्क ते भलेया आधुनिक सांझ भ्याली सरबंधी विषयें पर गल्लबात होई ऐ।

<><><><><><>

#### Cloud Burst Ramban

रामबन जिले दी राजगढ़ तहसील च बददल फट्टने दी कुदरती क्रोपी करी घट्टो-घट्ट 3 लोक मारे गे न ते दंडु होर अजें लापता न। रामबन दे अडिशनल डिप्टी कमीशनर वरुणजीत चाढ़क होरें दस्सेया ऐ जे एह कुदरती क्रोपी जन्दी राती तकरीबन 12 बजे राजगढ़ तहसील दे द्रुपदा गां च पेश आई। उनें दस्सेया जे घट्टो-घट्ट 3 लोकें दी मौत होई गई ऐ जिस्सलै के 2 जनें लापता न। उनें इब्बी दस्सेया जे SDRF, पुलस ते सिविल प्रशासन दियां टीमां मौके पर पुज्जी गेदियां न ते लापता लोकें दा पता लाने लेई अभियान रम्भी दिता गेदा ऐ।

<><><><><><>

#### LG -Committee

लैफ्टिनेंट गवर्नर मनोज सिन्हा होरें श्री माता वैष्णो देवी यात्रा मार्ग पर पिच्छले दिने लास-पस्सियां पौने दी घटना दे पिच्छे दियें वजहें दी जांच लेई इक त्रै मैम्बरी कमेटी खडेरी ऐ। इस कमेटी दी प्रधानता जल शक्ति विभाग दे अतिरिक्त मुख सचिव करगंन जदके जम्मू दे डिवीजनल कमीशनर ते IGP एदे मैम्बर होगंन। ए कमेटी दंडु हफ्ते दे अंदर-अंदर श्री माता वैष्णो देवी श्राईन बोर्ड दे अध्यक्ष लैफ्टिनेंट गवर्नर मनोज सिन्हा होरें गी अपनी रिपोर्ट सौपग। ध्यानजोग ऐ जे जंदे मंगलवारें श्री माता वैष्णो देवी यात्रा मार्ग पर लास-पस्सियां पौने करी केई सारे श्रद्धालुएं दी मौत होई गई ही जदके केई श्रद्धालु जखमी होए दे न।

<><><><><><>

## JMC -Water Supply

जम्मू च हाल दिये बरखें ते हाड़ दी वजह करी पानी सप्लाई आले बक्ख-बक्ख जरिये गी बड़ा मता नुक्सान पुज्जे दा ऐ जेदे चलदे जम्मू शैहरा दे केंड़िये परोआरें गी पानी दी बड़ी मती किल्लत झल्लनी पवा करदी ऐ। लोके गी पानी सप्लाई दी फौरी जरूरतें गी दिक्खदे होई जम्मू नगर-निगम आसेया शैहरा दिये बक्ख-बक्ख थाहरे पर पीने जोग साफ पानी दा बंदोबस्त कीता जा करदा ऐ। जम्मू नगर-निगम दे कमीशनर डाक्टर देवांश यादव होरे कल जम्मू वैस्ट थमां विधायक अरविंद गुप्ता हुंदे कन्नै इने बंदोबस्तें दा निरिक्षण करदे होई सरबंधित अधिकारिये गी पानी दी बेल्ले सिर सप्लाई यकीनी बनाने दे निर्देश दिते। इस मौके बोलदे होई जम्मू नगर-निगम दे कमीशनर डाक्टर देवांश यादव होरे आक्खेया.....

<><><><><><>

## Rana -ST Scholarships

जनजातीय मामले आले मैहकमे दे मंत्री जावेद राणा होरे जनजाती मामले सरबंधी केन्द्री मंत्रालय दे स्थापित दिशा-निर्देशे मुजब जनजाती समुदाय दे विद्यार्थिये गी बेल्ले सिर वजीफे उपलब्ध करोआने दी अपनी सरकार दी वचनबद्धता गी फही पक्का कीता ऐ। उने आक्खेया जे जनजाती समुदाय दे ST-2 श्रेणी दे विद्यार्थिये गी मैट्रिक शा पैहले ते एदे बाद आले वजीफे जारी करने दा इख्तेयार जनजाती मामले सरबंधी मैहकमे कश ऐ ते एदे च कुसे बी किस्मा दा कोई चिर नई लग्गी सकदा। मंत्री होरे मैहकमे दे सचिव ते डायरेक्टर, दौने गी ए निर्देश जारी कीता जे ओ जनजाती समुदाय दे सब्भने योग्य विद्यार्थिये सने ST-2 श्रेणी दे विद्यार्थिये गी बी सब्भने बकाया रौहन्दे वजीफे तुरत जारी करवाना यकीनी बनान।

<><><><><><>

## Mela Patt (Bhaderwah)

डोडा जिले च वासुकी नाग देवता गी समर्पत सलाना त्रै-रोजा "मेला पट्ट" कल भद्रवाह दे प्राचीन खाखल महल्ले च शुरु होआ। वासुकी नाग देवता होरे गी भद्रवाह घाटी दी रक्षा करने आहला देवता मन्नेया जंदा ऐ।

आकाशवाणी दे जम्मू संवाददाता नै जानकारी दी ऐ जे इस मेले दा सरबंध प्राचीन नाग परम्परा कन्नै जुड़े दा ऐ जेहड़ा सरबंध मुगल बादशाह अकबर ते भद्रवाह दे राजा नागपाल हुंदी ऐतिहासक मलाटी कन्नै बी दस्सेया जन्दा ऐ। इस बरे इस मेले च शिरकत करने लेई समूलचें जम्मू-कश्मीर दे बक्ख-बक्ख हिस्सें थमां लोक आए देन, जिन्दे च बक्ख-बक्ख धर्मे कन्नै तालुक रक्खने आहले लोक बी शामिल न। एह उत्सव राजा नाग पाल हुंदी आध्यात्मिक शक्ति ते बहादुरी गी चेता करदे होई 16मीं सदी थमा मनाया जा रदा ऐ।

<><><><><><>

#### Satish -Sports Day

युवा सेवाएं ते खेड्डें सरबंधी मैहकमे दे मंत्री सतीश शर्मा होरें आक्खेया ऐ जे राष्ट्रीय खेड्ड दिवस असेंगी अनुशासन ते एकता दी भावना दा एहसास करोआंदा ऐ, ते एह भावनां खेड्डां गै साड़े जीवन च आनदियां न। मंत्री होरें ए गल्ल हाकी दे जादूगर खोआने आले मेजर ध्यानचंद हुंदी जयंति दे मौके पर कल जम्मू दे के.के. हक्कू स्टेडियम च आयोजित राष्ट्रीय खेड्ड दिवस आले कार्यक्रम गी सम्बोधित करदे होई आक्खी। इस मौके बोलदे होई मंत्री होरें गलाया जे इस कार्यक्रम च जम्मू-कश्मीर दे बक्ख-बक्ख हिस्सें थमां नौजवानें गी हिस्सा लेंदे दिक्खना बड़े गै मान्ने आली गल्ल ऐ। उनें आक्खेया जे ए स्हाड़ी सब्भनें दी जिम्मेदारी ऐ जे अस भलेया हेठली सतह थमां युवा खडारियें दा दिल बधाचै तां जे ओ अग्गे औन ते अपनी प्रतिभा दे राएं देशा दा नां उच्चा करन।

<><><><><><>

#### Satish -Khour Visit

युवा सेवाएं ते खेड्डें सरबंधी मैहकमे दे मंत्री सतीश शर्मा होरें कल खौड़ सब-डिविजन च हाड़े दी मारे हेठ आए दे इलाकें दा व्यापक दौरा लाइयै उत्थे होए दे नुक्सान दा जायजा लैता ते जारी राहत ते आबादकारी मुतल्लक हीलें दी दिक्ख-सुन कीती। अपने दौरे दौरान मंत्री होरें प्रभावित परोआरें कन्नै गल्लबात करियै उनेंगी यकीन दोआया जे सरकार उन्दे कल्याण लेई वचने-बज्झी दी ऐ।

मंत्री होरें बक्ख-बक्ख मैहकमे दे अधिकारियें गी मौके पर गे हुकम रसाल कीते जे ओ इस गल्लै गी यकीनी बनान जे प्रभावित परोआरें गी अन्नदानें, LPG, ते होरनें जरुरी सेवाएं दी सप्लाई निरविघ्न हासल होऐ ते कन्नै गे प्रभावित होऐ दे सिड़क सम्पर्क ते ट्रांस्पोर्ट सुविधाएं गी बी युद्ध स्तरें पर ब्हाल कीता जा।

<><><><><><>

Rana -Tour (Byte)

जल शक्ति मैहकमे दे मंत्री जावेद राणा होरें जम्मू खिते च हाड़ें दी मारा हेठ आए दे गाएं- बरमीनी, गुड़ा, सरारी, बठिंडी, सुंजवां ते चट्ठा दा व्यापक दौरा लाइयै एकड़े इलाकें च जमीनी सतह पर बने दे हालात दा जायजा लैता ते जारी राहत ते बा-आबादकारी मुतल्लक हीलें दी दिक्ख-सुन कीती। राज्यसभा सांसद गुलाम अली खटाना होर बी इस मौके पर मंत्री हुंदे कन्नै हे। दौरै दौरान मंत्री होरें पुर्नब्हाली सरबन्धी जतनें दी रफ्तार बदाए जाने दी फौरी जरुरतें पर जोर दिंदे होई सब्भनें प्रभावित परिवारें गी बेल्ले सिर सहायता उपलब्ध करोआने दी सरकार दी वचनबद्धता गी फ्ही पक्का कीता। राणा होरें डोंगी आले हायर सकेन्ड्री स्कूल च बनाए गेदे राहत कैम्प दा बी दौरा लाया जित्थे बरमीनी गां थमां विस्थापित होऐ दे केंई सारे परोआरें गी आरजी तौरा पर आसरमा दिता गेदा ऐ। मंत्री होरें प्रभावित परोआरें कन्नै गल्लबात करियै उन्दियें समस्याएं गी सुनेया। मीडिया कन्नै गल्ल करदे होई मंत्री जावेद राणा होरें आक्खेया.....

<><><><><><>

NHW Closed

जम्मू-कश्मीर च भारी बरखा हाड़ ते लास-पस्सियां पौने कारण जम्मू-श्रीनगर राष्ट्रीय जरनैली सिड़क अज्ज उप्परोतली 5में रोज बी गड़डियें दी आओ-जाई लेई बंद ऐ। ढाई सौ किलोमीटर कोला लम्मी इस जरनैली सिड़कें पर अजे बी कोई 5 ज्हार कोला मतियां गड़डियां बतै फसी दियां न। केंइये जिले च रसोई गैस, तेल पट्रोल, फल-सब्जियां ते होरनें जरुरी चीजें बस्तें दी कमी होई गेदी ऐ कीजे ऐसा समान लेइयै जाने आलियें ज्हारां गड़डियां जरनैली सिड़क बंद होने कारण अपनी मंजल तोड़ी नेही पुज्जी सकै करदियां न।

उधमपुर च जखैनी ते चनैनी बश्कार बी केंई थाहरें रुकावट आवा करदी ऐ ते हून रामबन च बददल फटटने दी घटना दे बाद रस्ता खुल्लने दे आसार होर मते घट्ट होई गेदे न। प्रशासन दा उआं आक्खना ऐ जे ऐतिहासक मुगल रोड ते किशतवाड़ सिंथन सिइकां लौहकियें गइडियें लेई खुल्लियां न।

<><><><><><>

Weather

मौसम विभाग नै अज्ज बी जम्मू-कश्मीर च केंई थाहरें गर्जी-चमकियै बरने दे आसार दस्से न, टकोहदा करियै दपैहरी मगरा कोला लियै चिरे राती तगर मैहकमे मुजब 30 अगस्त कोला लेइयै पैहली सितम्बर तोड़ी केंई इलाकें च हलके कोला दर्मेयाने दर्जे दी ते जम्मू प्रांतै दे किश जिले च भारी बरखा दे बी आसार न।

<><><><><><>